

客家語朗讀文章國中學生組（四縣腔）

【家鄉个名產】朱淑琴原作

車仔行過鬧熱个都市，來到好山好水个莊下。白雪雪个雲在天頂遊啊遊，青溜溜个田坵連到山腳下，風涼沁沁仔，一陣陣仔个青草味鑽入鼻空，這就係个家鄉——臺灣个長壽村「關西」。講著關西，就會分人想著有名个「仙草」！

阿公阿婆戴在關西，阿公係煞猛个耕種人，屋下也有種仙草。嫩嫩幼幼个仙草，葉仔細細皮、有絨毛，矮矮仔無幾高，一大片仙草田，差毋多半年就做得收成，割下來再過放在禾埕晒，晒到燥絲絲，該就做得煲來食也。

「阿公，該草仔仰會安到仙草呢？」還細該下，盡想問著一個柄來擎个侄緊問阿公。阿公就摻侄講：「頭擺人做田事、行山路，日頭上煎下煬¹，晒到人頭暈腦疫、懶拐拐仔，恁堵好！毋知麼儕恁好心煮咧仙草茶，分人咁咁毋會發痧，人也精神起來，該怕係仙人送草來哦！還有一種講法：講仙草茶煮一鑊，擺兜仔煬粉攏攏啊，鮮鮮變醜醜，仰般恁大鑊？該怕係仙人來變過！故所『仙草』也安到『仙人草』。」

仙草晒燥來煲水，清涼解毒人人愛。一大坵軟軟个仙草剝剝啊，加兜仔冰砵擺兜仔糖水，軟軟滑滑透心涼！日頭烈烈个熱天，食仙草最退火；冷天時節，寒風咻咻滾，冷到人嘩嘩掣，一碗燒仙草，紅豆、綠豆、番豆，芋圓、粉圓、細版圓共下食，燒氣衝天食到笑連連！滑溜个仙草，對喉嚨頭溜到肚屎肚，燒暖个感覺也流到歸圓身，實在還享受哦！

仙草也做得做鹹个料理，阿婆用仙草來燉土雞仔，加兜仔紅棗、甘杞，烏金烏金个雞湯，有特別錫人个味緒，看到人个口涎水就溶溶跌！這仙草雞湯分人補身體、有元氣，見擺侄就食到舐嘴攏鼻²哦！

時代緊進步，仙草經過千年百載無分人擯忒，顛倒還較受人歡迎！傳統市場、超級市場，全都有佢个身影。這下，最時行个手搖飲料店，仙草乳茶長透賣到淨淨空空！去到關西名產店，啊哦！還有即溶仙草粉、仙草麵條、仙草茶箍哩！

「一寸土地一寸情，千金難買故鄉情。」仙草毋單淨係客家人愛，還較係大家都知个好名產。實在講：天地精華在這草，清涼補肝又退火，冷燒鹹甜滋味好，關西仙草最係寶！想著家鄉个名產，侄就感覺歡喜又光榮啊！

¹ 上煎下煬：音 song jien' ha' bed'；此指上有烈日當空，下得承受太陽的熱輻射。

² 舐嘴攏鼻：音 se' zoi liab' pi；食物美味讓人意猶未盡。

【家鄉个名產】朱淑琴原作

車仔行過鬧熱个都市，來到好山好水个莊下。白白个雲在天頂游啊游仔，青里里个田連到山腳下，風涼沁涼沁，一陣陣个青草味鑽落鼻空，這就係个家鄉——臺灣个長壽村「關西」。講著關西，就會分人想著有名个「仙草」咧！

阿公、阿婆戴在關西，阿公係煞猛个耕種人，屋下也有種仙草。嫩嫩幼幼个仙草，葉仔細細皮、有絨毛，矮矮仔無幾高，一大遍仙草田，差毋多半年就做得收成，割下來再過放在禾埕晒，晒到燥燥，就做得煮來食。

「阿公，該草仰安到仙草呢？」細細該下，當好問支柄來擎¹个，緊問阿公。阿公就摺佢講：「頭擺人做田事、行山路，日頭上煎下煬²，晒到頭暈腦疼懶拐拐仔，恁堵好！毋知麼儕好心煮仙草茶來分大家食，大家啉了毋單淨毋會熱著！還嘎精神起來，斯講該怕係仙人送草來个哦！還有一種講法：仙草茶煮一鑊，摺兜太白粉攙攙仔，鮮鮮个變醃醃咧，看起來當大鑊，斯講，該怕係

仙人來變个！所以『仙草』乜安到『仙人草』。」

仙草晒燥來焗水，清涼解毒人人愛。一坵仙草剝剝仔，加兜冰砵、摺兜糖，軟軟滑滑透心涼！日頭烈烈个熱天，食仙草最退火；冷天時節，寒風咻咻滾，冷到嗶嗶掣，一碗燒仙草，加紅豆、綠豆摺地豆，無斯芋圓、粉圓、細板圓共下食，燒氣衝天，食到笑連連！滑溜个仙草，對喉嚨頭溜到肚屎肚，燒暖个感覺乜流到歸膺身，實在還享受哦！

仙草乜做得做鹹个料理，阿婆用仙草來燉土雞仔，加兜紅棗、枸杞落去，烏金烏金个雞湯，有特別錫人个味緒，看著口水就溶溶跌！這仙草雞湯分人補身體、有元氣，佢見擺都食到舐嘴攞鼻³！

時代緊進步，仙草經過千年百載無分人擯忒，顛倒還較受人歡迎！傳統市場、超級市場，全有佢个身影。這下，最時行个手搖飲料店，仙草乳茶長透賣到淨淨、空空！去到關西名產店，唉哦！還有即溶仙草粉、仙草麵條、仙草茶箍哦！

「一寸土地一寸情，千金難買故鄉情。」仙草毋單淨係客家人愛，還較係大家都知个好名產。實在講：天地精華在這草町⁴，清涼補肝又退火，冷燒鹹甜滋味好，關西仙草最係寶！想到家鄉个名產，佢就感覺歡喜又光榮啊！

¹ 問支柄來擎：音 mun^ˋ gi^ˋ biang^ˋ loi kia；打破砂鍋問到底。

² 上煎下煬：音 shong⁺ zien^ˋ ha^ˋ bed；形容烈日當空非常炎熱。

³ 舐嘴攞鼻：音 she^ˋ zhoi^ˋ liab^ˋ pi⁺；食物美味讓人意猶未盡。

⁴ 草町：音 co^ˋ nen^ˋ；草裡。